



# basic education

Department:  
Basic Education  
**REPUBLIC OF SOUTH AFRICA**

## NATIONAL SENIOR CERTIFICATE

**LIBANGA 12**

**SISWATI LULWIMI LWASEKHAYA (HL)**

**LIPHEPHA LESIBILI (P2)**

**INDLOVANA/INDLOVULENKHULU 2015**

**EMAMAKI: 80**

**SIKHATSI: 2½ ema-awa**

**Leliphepha linemakhasi la-22.**

**TICONDZISO KULABAHOLWAKO**

1. Fundzisia leticondziso ngembikwekutsi ucale kuperendvula imibuto.
2. Ungalifundzi lonkhe liphepha lemibuto. Buka lokucuketfwe ekhansi lelilandzelako bese ubeka lumphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimpahawu kuperhela bese ukhetsa leyo lofunu kuperendvula yona.
3. Liphepha lemibuto licuketse TIGABA LETINTSATFU:

SIGABA A: Tinkondlo (30)  
 SIGABA B: Inovelil (25)  
 SIGABA C: Umdlalo (25)

4. ISIHLANU imibuto lekfanele uyiphendvule seyiyonkhe: ESIGABENI A imibuto mitsatfu (3), ESIGABENI B munye (1), ESIGABENI C munye (1) ngalendlela:

**SIGABA A: TINKONDLO**

TINKONDLO LETIFUNDVWE EKLASINI - Phendvula imibuto ibe MIBILI.  
 ETINKONDLWENI LETINGAKAFUNDVWA EKLASINI – Uphocelelekile kuperendvula lombuto.

**SIGABA B: INOVELI**

Phendvula umbuto ube MUNYE.

**SIGABA C: UMDLALO**

Phendvula umbuto ube MUNYE.

5. KUKHETFWA KWETIMPHENDVULO TESIGABA B (INOVELI) NESIGABA C (UMDLALO)

- Phendvula KUPHELA imibuto yenoveli loyifundzile kanye nemdlalo lowufundzile.
- Phendvula UMBUTO MUNYE WENDZABAMBHALO kanye NAMUNYE UMBUTO EMIBUTWENI LEMIFISHA. Nangabe ukhetse kuperendvula umbuto wendzabambhalo ESIGABENI B, uphocelelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphocelelekile kutsi uphendvule umbuto wendzabambhalo ESIGABENI C. Sebentisa luhlu lwekutikhumbuta kute usitakale.

6. BUDZE BETIMPHENDVULO

- Imibuto yendzabambhalo etinkondlwani kufanele iphendvulwe ngemagama la-190–240.
- Indzabambhalo yeNoveli neMdlalo kufanele iphendvulwe ngemagama la-340–390.
- Budze betimphendvulo temibuto lemifisha bufanele buhambisane nelinani lemamaki labekiwe. Labahlolwako kufanele banganhlanhlatsi.

7. Fundzisia kahle ticondziso letisekucaleni kwaleso naleso sigaba.
8. Tinombolo tetimphendvulo atihambisane naletu temibuto njengobe tinjalo ephepheni lemibuto.
9. Cala LESO NALESO sigaba ekhasini LELISHA.
10. Siphakamiso sekulawulwa kwesikhatsi:  
  
SIGABA A: Lokungenani emaminiti la-40.  
SIGABA B: Lokungenani emaminiti la-55.  
SIGABA C: Lokungenani emaminiti la-55.
11. Bhala ngesandla lesibonakalako nalesifundzekako.

**LIKHASI LALOKUCUKETFWE**

Lelikhasi litawusita bahlolwa kutsi bakwati kukhetsa imibuto labafuna kuyiphendvula ngaphandle kwekufundza lonkhe liphepha lemibuto.

**SIGABA A: TINKONDLO**

Tinkondlo Letimisiwe: Phendvula nobe nguYIPHI imibuto LEMIBILI.

<b>INOMBOLO YEMBUTO</b>	<b>UMBUTO</b>	<b>EMAMAKI</b>	<b>LIKHASI</b>
1. Mahlahlandela	Umbuto loyindzabambhalo	10	6–7
	<b>NOBE</b>		
2. Iwil' Insika	Imibuto lemifisha	10	7–8
	<b>NOBE</b>		
3. Ngihayel' Inkondlo	Imibuto lemifisha	10	8–9
	<b>NOBE</b>		
4. Kants' Uphumula Nini?	Imibuto lemifisha	10	10–11
	<b>NA</b>		

Inkondlo lengakafundwa eklasini: **Uphocelekile kuphendvula lombuto.**

5. Bhala Mabhalane	Imibuto lemifisha	10	11–12
--------------------	-------------------	----	-------

**SIGABA B: INOVELI**

Phendvula umbuto MUNYE.

6. <i>Liphume Nebovu</i>	Umbuto loyindzabambhalo	25	13
	<b>NOBE</b>		
7. <i>Liphume Nebovu</i>	Imibuto lemifisha	25	13–15
	<b>NOBE</b>		
8. <i>Kubamba Letingelako</i>	Umbuto loyindzabambhalo	25	15
	<b>NOBE</b>		
9. <i>Kubamba Letingelako</i>	Imibuto lemifisha	25	15–17

**SIGABA C: UMDLALO**

Phendvula umbuto MUNYE.

10. <i>Kwahlwa Emini</i>	Umbuto loyindzabambhalo	25	18
	<b>NOBE</b>		
11. <i>Kwahlwa Emini</i>	Imibuto lemifisha	25	18–20
	<b>NOBE</b>		
12. <i>Umvuzo</i>	Umbuto loyindzabambhalo	25	20
	<b>NOBE</b>		
13. <i>Umvuzo</i>	Imibuto lemifisha	25	21–22

**CAPHELA:** Esigabeni B na-C, munye umbuto lophendvuliwe ufanele ube YINDZABAMBHALO nobe IMIBUTO LEMIFISHA. Awukavumeleki kutsi uphendvule tindzabambhalo LETIMBILI nobe imibuto lemifisha LEMIBILI.

**LUHLA LWEKUTIKHUMBUTA**

Lelikhasi litawusita bahlolwa kutsi ngabe baphendvule linani lemibuto lekungyo lekumele bayiphendvule.

SIGABA	TINOMBOLO TEMIBUTO	LINANI LEMIBUTO LEPHENDVULWAKO	TICK ✓
<b>A: Tinkondlo</b> (Tinkondlo letifundvwe eklasini)	1–4	2	
<b>A: Tinkondlo</b> (Inkondlo lengakafundvwa eklasini)	5	1	
<b>B: Inovelī</b> (Indzabambhalo nobe imibuto lemifisha)	6–9	1	
<b>C: Umdlalo</b> (Indzabambhalo nobe imibuto lemifisha)	10–13	1	
<b>CAPHELA:</b> Esigabeni B na-C, cinisekisa kutsi uphendvule YINYE INDZABAMBHALO NAMUNYE umbuto WEMIBUTO LEMIFISHA. Awukavumeleki kutsi uphendvule tindzabambhalo LETIMBILI nobe imibuto lemifisha LEMIBILI.			

**SIGABA A: TINKONDLO****TINKONDLO LETIFUNDVWE EKLASINI**

Khetsa tinkondlo tibe TIMBILI kuleti letilandzelako uphendvule ngato imibuto letawulandzela.

**UMBUTO 1: UMBUTO LOYINDZABAMHALO**

Fundza lenkondlo lelandzelako bese uphendvula umbuto lotawulandzela.

**MAHLAHLANDLELA – JJ Thwala**

- 1 Labakwatiko batsi:
- 2 Ulisango lemphilo,
- 3 Usihlutfulelo semphilo,
- 4 Ulitibuko lemphilo,
- 5 Ungumhlahlandlela wemphilo.
- 6 Sango lemphilo yemuntfu,
- 7 Vulela lusapho IwakaNtfu
- 8 Lwendlule luhangelane kuwe,
- 9 Lugijime ngematubane lamakhulu
- 10 Luyofinyelel' esicongweni sakamfundvo
- 11 Kulelibuswa nguNgcondvonkhulu.
- 12 Sihlutfulelo semphilo yemuntfu,
- 13 Vuleka singene ngekhatsi
- 14 Kuletindvongakati letinkhulu,
- 15 Siyotsekela Iwati lolujulile
- 16 Sigogodze inhlakanipho yaseNshonalanga,
- 17 Sinots' emphefumulweni nasengcondvweni.
- 18 Tibuko lemphilo yemuntfu,
- 19 Welisa labafuna kuwela
- 20 Bafinyelele mshiyalowa,
- 21 Bayogidza batibetsele,
- 22 Bahomele likusasa
- 23 Lelingatiwa ngumuntfu.
- 24 Mlahlandlela wemphilo yemuntfu,
- 25 Yihlahle kumnyama kubovu,
- 26 Kubhukul 'emajaha embutfo,
- 27 Kubhukule tintfombi telibutfo,
- 28 Kuphumelele banumzane labatimisele,
- 29 Kuphumelele bomake labatimisele.
- 30 Labakwatiko batsi:
- 31 Uyinsimu lemakhabakhaba,
- 32 Usiyalu lesigobhot' umlibe,
- 33 Uyimbita lebil' umlibe,
- 34 Ulifa lelim' umlibe.

Bhala indzatjanambhalo ngekusetjentiswa kwesifanisongco kulenkondlo lengenhla.

Budze bemphendvulo yakho abube ngemagama langabi ngaphasi kwala-190 kodvwa angabi ngetulu kwala-240.

[10]

## NOBE

### **UMBUTO 2: IMIBUTO LEMIFISHA**

Fundza lenkondlo lelandzelako bese uphendvula imibuto letawulandzela.

#### **IWIL' INSIKA – JJ Thwala**

- 1 Yeka leto tikhatsi
- 2 Letendlula lettingenawuphindze tibuye:
- 3 Tendlulise kwemanti lageletako
- 4 Tendlulise kwemphilo yesotsamlilo
- 5 Lenemabanga lamafisha njalo
- 6 Lendlul' ingab' isakhonjwa ndzawo.
  
- 7 O! Nkhosikati yelikhaya,
- 8 Bekukuhl' usime ngensika,
- 9 Bekukuhl' unemtfunti wekukhosela,
- 10 Kubuhlungu kuyashacisa namuhla,
- 11 Sililo setinyembeti sodvwana.
  
- 12 Yebo-ke, awehl' umoya ...
- 13 Insika lebeyimise likhaya
- 14 Kusukela kwatsi nhlo,
- 15 Idliwe ngumuhlwa yawa,
- 16 Kayiphindz' ivuke nanini.
  
- 17 Kuyobuye kulunge, cola ...
- 18 Nob' emanceb' opha,
- 19 Nobe tilondza tibhibba,
- 20 Nom' iminjunju ifutsa,
- 21 Kulukhuni kulitje kuwe,
- 22 Cola ... cola ... cola ...
  
- 23 Bukhulu nebucotfo bakho,
- 24 Umusa nesimilo sakho,
- 25 Kuyawufakw' emehlo tedzeleli,
- 26 Tikuchukulute nom' usemantini
- 27 Ngob' ungasenansika lekumisile.
  
- 28 Emehlw'en' akho kuyakwakheka
- 29 Emachaphoti lachucha tinyembeti,
- 30 Buso bakho lobubusheleleti
- 31 Buvele tisihla letingahhudluleki,
- 32 Boph' inhlitiyo ngamabopha.

33 Bamb' inhlitiyo uyibambisise,  
 34 Landzel' umgudvu lofanele,  
 35 Tifanise nalabanye bantfu.  
 36 Kwemhlaba kuyendlula Mntfwanebantfu,  
 37 Lokwentekile kuyafana nalokwadalwa.

- 2.1 Shano kutsi bunkondlo buni lesibutfolo emgceni 22 walenkondlo lengenhla. (1)
- 2.2 Caphuna umugca wenkondlo lomumetse sifaniso endzimeni yekucala yalenkondlo lengenhla. (1)
- 2.3 Yini lebangela sonkondlo asebentise lumphawu (...) lapha emgceni 17? (1)
- 2.4 Lenkondlo lengenhla iluhlobo luni? (1)
- 2.5 Hluta kujula kwesihloko lesitsi 'Iwil' insika.' (2)
- 2.6 Wena ubona kutsi sonkondlo uyibhekise kubani lenkondlo lengenhla? Sekela imphendvulo yakho ubhekise kuyo lenkondlo. (2)
- 2.7 Chaza imiphumela lemibili lemibi levame kuba khona nangabe insika iwile. (2)  
**[10]**

**NOBE****UMBUTO 3: IMIBUTO LEMIFISHA**

Fundza lenkondlo lelandzelako bese uphendvula imibuto letawulandzela.

**NGIHAYEL' INKONDLO – JJ Thwala**

1 Ngihaye' inkondlo  
 2 Yemhlaba wonkhe jikelele,  
 3 Ivakale ngesigci lesihehako,  
 4 Itsints' imizwa nemitsambo,  
 5 Itsints' imicabango lejulile,  
 6 Ikhutsat' emandla nesineke  
 7 Sekulwa **nenjabho nendzangalo.**  
  
 8 Ngihayel' inkondlo,  
 9 Inkondlo yemanon' emicabango,  
 10 Lelets' intfokoto lemangalisako,  
 11 Iletse kukhanyiselwa kabusha  
 12 Emcondvweni nemphefumulweni,  
 13 Ngiphil' imphilo lensha,  
 14 Ngincob' imphi letfunatako.

15 Ngihayel' inkondlo,  
 16 Inkondlo yenkhululeko yemphefumulo,  
 17 Uyihaye busuku nemini,  
 18 Ingilolotele kwemlolotel' ebusuku,  
 19 Ingikhutsat' emsebentin' emini,  
 20 Ngijabule ngigidze ngedvwana  
 21 Ngobe ngingakagagawuli yembangandlala.  
  
 22 Ngihayel' inkondlo,  
 23 Inkondlo yekudvumisa  
 24 Buhle bemvelo yemhlaba,  
 25 Lobugcamis' imphilo yemhlaba,  
 26 Ledzinga kukhutsala kwaSikhutsali,  
 27 Kwetsembeka kwaTsembeka,  
 28 Kulunga kwaLunga.  
  
 29 Ngihayel' inkondlo,  
 30 Inkondlo yetinzululwati  
 31 Levet' imikhakha yebunzululwati.  
 32 Funa ngibe ngumunt' ebantfwini,  
 33 Ngitfol' inkhululeko yengcondvo,  
 34 Umhlaba ngiwubuke ngalamany' emehlo.

- 3.1 Shano iuhlobo lwebunkondlo loluvetwa ngulamagama lamnyama emgceni 7 walenkondlo lengenhla. (1)
- 3.2 Yini lebangela sonkondlo lapha emgceni 9 atsi, 'Inkondlo yemanon' emicabango?' (1)
- 3.3 Shano bunkondlo lobumumetfwe ngulemisindvo ledvwetjelwe emgceni 20 walenkondlo. (1)
- 3.4 Yini kusetjentiswe emagama laphikisanako latsi, busuku nemini lapha emgceni 17 walenkondlo? (1)
- 3.5 Bunkondlo buni lobuvetwa ngulamagama ladvwetjelwe emigceni 15 na 16 yalenkondlo lengenhla? Usho ngani? (2)
- 3.6 Ase ucatsanise iphethini yemigca 30 ne-31 kulenkondlo. (2)
- 3.7 Chaza kube KUBILI lokufanele kutsi kwentiwe kuze kufezeke naku lakhuluma ngako sonkondlo kulenkondlo lengenhla. (2)  
[10]

**NOBE**

**UMBUTO 4: IMIBUTO LEMIFISHA**

Fundza lenkondlo lelandzelako bese uphendvula imibuto letawulandzela.

**KANTS' UPHUMULA NINI? – JJ Ncongwane**

- 1       Uma ngihamb' uyagcumagcuma  
 2       Utfutsel' utsats' ubeke,  
 3       Ufise lok' ufise lokwa,  
 4       Wale lok' ufune lokwa;  
 5       Ngikuyise ngasemitfonjeni lepholile,  
 6       Ngihlale kulepholile imitfunti  
 7       Ngiphumule ... wen' ushaye njalo,  
 8       Ubelesele ngesivinini sakho semihla;  
 9       Kants' uphumula nini?
- 10      Ngiye ngijabule ngitsi  
 11      Shona langa ngitewuphumula ...  
 12      Uma ngidvonsa siphuku  
 13      Ucala phasi ngemibalo yakho,  
 14      Ucale kancan' ungikhumbute  
 15      Lebekwentek' emini yalamuhla,  
 16      Wendlul' ungcabangise tayitololo,  
 17      Utsatseke ngematsemba netifiso takusasa;  
 18      Kants' uphumula nini?
- 19      Ngilala ngikushiy' unoma,  
 20      Ngitumeka solo wen' udidiyela,  
 21      Uhamb' ungishiy' ube ngumcubashi  
 22      Emaven' enjabulo netinsizi,  
 23      Lapho tifiso tikutfwala tikubeke khona,  
 24      Ungishiye ngisiphala' emaphusheni;  
 25      Ungishiye ngilele ngentfokomalo;  
 26      Kants' uphumula nini?
- 27      Buka sebakubonile bodokotela  
 28      Kutsi laph' ukhuphuk' imicansa  
 29      Wetfwel' imicabango netifiso,  
 30      Udvons' elubikibikini lwendvumalo,  
 31      Ugabadvul' imimango yetinsizi,  
 32      Kuvakale nemoya sewushona phansi;  
 33      Uva sebatsi kufanel' uphumule,  
 34      Kants' uphumula nini?
- 35      Labakwati ncono bats' ulibikawozi,  
 36      Kuwe kuhlum' ematsemba netifiso,  
 37      Kuphekwe nelutsandvo lumphume;  
 38      Nalokubi batsi kuvela kuwe,  
 39      Nentondvo nemavundvo kukuwe,  
 40      Kungak' usigayo lesingaphumuli,

- |    |  |
|----|--|
| 41 | Nasidziniwe ngulokuhle sigcakaza lokubi; |
| 42 | Kantsi nasewuphemba kuthula nelucolo     |
| 43 | Utsats' ubeke taba tekudvudvuta          |
| 44 | Kungats' ilitiko lemhlajelo wekuthula;   |
| 45 | Nome kunjalo kants' uphumula nini?       |

- 4.1 Hluta imigca ye-19 ne-20 yalenkondlo ubhekise esakhiweni sangaphandle. (1)
- 4.2 Bekakusiphi simo sonkondlo nakabhala lenkondlo lengenhla? (1)
- 4.3 Usho kutsini sonkondlo lapha emgceni 19 nasibhekisa kulenkondlo lengenhla? (1)
- 4.4 Yini lebangela sonkondlo kwekutsi asebentise lomusho loyimphindvwa lotsi, 'Kants' uphumula nini' kulenkondlo lengenhla?' (1)
- 4.5 Nasibuka kujula kwalenkondlo, wena utsi ukhuluma ngani sonkondlo? Usho ngani? (2)
- 4.6 Wena ucabanga kwekutsi sonkondlo ufunu kwekutsi uphendvulwe ngubani lombuto wenkondlo losekugcineni kwaleyo naleyo ndzima? Usho ngani? (2)
- 4.7 Chaza kutsi yini lebangela kutsi loku lakhuluma ngako sonkondlo kungaphumuli nasibhekisa enkondlwani yonkhe. (2)
- [10]**

**NA****INKONDLO LENGAKAFUNDVWA EKLASINI:**

WONKHE umholowa uphocelekile kutsi awuphendvule lombuto.

**UMBUTO 5:**

Fundza lenkondlo lelandzelako bese uphendvula imibuto letawulandzela.

**BHALA MABHALANE – M Ngwenya**

- |   |   |
|---|---|
| 1 | Bhala mabhalane,                            |
| 2 | Nkhsosi yabomabhalane.                      |
| 3 | Khulum' ucecebule mcecebule.                |
| 4 | Wena locecebule' untfweshule                |
| 5 | Leyo ngubo lembonye kukhanya.               |
| 6 | Khanyisela timphumphutse Makhanya.          |
| 7 | Ukhanyisele boNtfombi baphum' ebuntfombini, |
| 8 | Ukhanyisele boMajaheni bangen' ebubabeni.   |

9 Mchubi wetinkhomo tiy' edibhini,  
 10 Tingene tiphumele ngeshey' utibukile.  
 11 Uncandzek' ulandze letinye  
 12 Utibhabhatise kulo lelo damu lowadadama kulo.  
 13 Utingcabishis' etigodzini netisele lowatingcabisha.  
 14 Emadlelo laluhlat' ekukhotsis' atiwa nguwe  
 15 Matinikela ngemphilo, tichube tiye kuwo.  
 16 Bahleti banikati ngobe batsembe wena  
 17 Tsemba lematsemb' esintfu.

[Inyoni Yemasi likhasi 15–15]

- 5.1 Sonkondlo unemagama lagcizelela ngawo endzimeni yekucala, nyomula leligama nobe umugca locuketse lokugcizelela. (1)
- 5.2 Ngutiphi letinkhomo letichutjwa ngulona lobongelewako? (1)
- 5.3 Nika sizatfu sekutsi kutsiwe lona lobongelewako uyinkhosи yabomabhalane. (1)
- 5.4 Hluta imigca we-4 ne-5 yalenkondlo ubhekise esakhiweni sangaphandle senkondlo. (Nika liphuzu linye kuphela). (1)
- 5.5 Chaza kutsi sonkondlo ucondze kusitjelani ngemugca 9 walenkondlo lengenhla. (2)
- 5.6 Shano kutsi emagama latsi 'emadlelo laluhlata' lapha emgceni 14 ngabe akhetseke kahle yini. Usho ngani? (2)
- 5.7 Nasibhekisa ekujuleni kwenkondlo, wena utsi lenkondlo lengenhla ikhuluma ngani? Usho ngani? (2)
- [10]**

**SAMBA SESIGABA A:** **30**

**SIGABA B: INOVELI**

Kulesigaba kunemanoveli lamabili. Wena-ke khetsa ibe YINYE loyifundze eklasini lonyaka uphendvule ngayo.

**CAPHELA:** Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli loyifundzile. Nangabe ukhetsa kuphendvula umbuto wendzabambhalo ESIGABENI B, uphocelelekile kutsi ESIGABENI C uphendvule imibuto lemifisha.

**UMBUTO 6: UMBUTO LOYINDZABAMBHALO****LIPHUME NEBOVU – BB Malangwane**

Bhala indzabambhalo lapho uveta khona kuphumelela nobe kwehluleka kwembhali kuveta umbono wakhe kulenoveli.

Indzabambhalo yakho ayibe nemagama langabi ngaphasi kwala-340 kodvwa angabi [25] ngetulu kwala-390.

**NOBE****UMBUTO 7: IMIBUTO LEMIFISHA****LIPHUME NEBOVU – BB Malangwane**

Fundza leteksthi leyincenyenye yenzaba bese uphendvula imibuto letawulandzela.

Kusehlobo, lilanga libalele nasebukhweni betinja. Njengobe sekusemini lenkhulu nje lase likhipha inhlanti emantini. Lapha ekhaya kaLushawulo kunesalukati lesingunina kanye nebatukulu baso, bahleti phasi kwestihlahla semganu ngenca yalo lilanga. Lesihlahla besiseceleni kwendlu yaTintfombi.

Kulo lelo langa lelalibila, bafati baLushawulo lalibabhadlisa esigangeni. Phela bebauke ngeluvivi bayewufuna emakhatsakhatsa emntfwana waTintfombi labesabangwa netibi. Lomntfwana abesewesibili agula ngalendlela. Lona lowelanywa ngulona naye wagcina asashonile. Intfo leyayitsandza kuba yimphicabadzala ngulokutsi labantfwana baphatfwa sifo sinye futsi sibacala nasebakhassa bonkhe. Nalapho bebaukele khona kute litsema lebabanika lona. Tavele talandvula tinhlololo. Babuyela ekhaya bajabhile impela.

'Nangu make nee, nee, nee,' kusho lomunye umntfwana lowababona bonina kucala. Kwatsi mpu umsindvo sebahlangabeta bonina. Gogo wabo lobekasatumekile naye wavuswa ngumsindvo. Wavuka wahlala ngetibunu asalindzele kuva kutsi bahambe njani bomalukatana bakhe. Asababuka beta ebaleni walubona lusizi lolwalubhalwe ebusweni babo. Umcumo wase umunye kumntfwana lowabesagonwe nguLaMagagula. Befika bahlala phasi ngekupheleliwa ngemandla bangasenandzaba netihlantsi.

'Buyanini phela bomalukatana, ingabe nihambe njani nebakitsi?' 'Cha make sihambe kahle ngobe sibakhandzile lapho besiye khona. Lokubuhlungu kwekutsi kufa kuya embili. Solo akubenti nani buncono,' kuphendvula LaMagagula, aniketa Tintfombi lomntfwana. 'Asewetame kummunyisa ngobe lapho akhona nendlala seyikhona ngobe ugcine kadzeni kumunya.' Nobe bantfwana bebangati kutsi kwente njani lapha ekhaya kepha simo salabadzala savele sayichaza yonkhe indzaba kutsi kukhona intfo lembi lapha ekhaya.

'NaboKhetsile! boKhumalo, kodvwa soneni kutsi singaze semukwe lijaha lelihle kangaka!' Watsi asambukile wava la emehlo kwaba kuphela kwakhe. Lapho kwesuka lesikhulu sidvumo. Tintfombi abekhala ate atigicite.

'Muzi, hambani niywubikela bakaMfundisi kutsi lomntfwana lebekagula sewendlulile,' kusho LaMagagula. Batsi bafulatsela bantfwana babe bacala kwekhweta boLaMagagula bentela kutsi batsi befika bantfu batfole indzawo seyikhona endlini.

[Likhasi 63–64]

- 7.1 Chaza simonhlalo semoya kuletheksthi lengenhla. (2)
- 7.2 Shano inkholelo yaLaMagagula bese ucaphuna umusho lofakazela imphendvulo yakho kuletheksthi lengenhla lechaza inkholelo yaLaMagagula. (2)
- 7.3 Nawubuka simo selitulu lesivetwe ekucaleni kwaletheksthi, yini lebeyingahle ibe yinkinga lenhulu kulesimo lesebakuso lapha kaLushawulo? Chaza ubhekise esimeninhlalo sendzawo. (2)
- 7.4 Phawula ngesento saTintfombi ngalendlela abekhala ngayo ngekufa kwemntfwanakhe ubhekise esiphetfweni salenoveli. (2)
- 7.5 Lukhamba lufute imbita. Chaza lesaga ubhekise emphilweni yaLushawulo neyise. (2)
- 7.6 Bhala sigameko lesakha sicakacaka kulenoveli, usho nekutsi usho ngani kutsi sakha sicakacaka. (2)
- 7.7 Nangabe inkinga leyabangela kutsi Lushawulo angeti emngcwabeni wemntfwanakhe lotalwa yintsandvokati yakhe kukufika kadze kwemmbiko, beyingasonjululwa ngayiphi indlela kulesikhatsi salomuhla? Bhala tindlela tibe TIMBILI. (2)
- 7.8 Nawufundzisisa letheksthi lengenhla ngabe umbhali walencwadzi uyakholelw yini etinhlolweni nobe cha? Sekela imphendvulo yakho. (2)
- 7.9 Kubalulekile kutsi babe welikhaya atimele tindzaba temuti wakhe njengensika yelikhaya. Bhala umbono wakho ngendlela Lushawulo abesenetisa ngayo lesitatimende. (2)
- 7.10 Utsini umbono wakho ngalendzawo lebebayise lomntfwana logulako kuyo? (2)

- 7.11 Catsanisa inkholelo yetento taLaMagagula nenkholelo yetento taLushawulo kulenoveli. Sekela imphendvulo yakho ngekubhekisa enovelini. (2)
- 7.12 Bhala tigameko LETINTSATFU letiveta ingcikitsi yalenoveli ibe sobala. (3)  
**[25]**

**NOBE**

## **UMBUTO 8: UMBUTO LOYINDZABAMHALO**

### **KUBAMBA LETINGELAKO – DE Nkosi**

Bhala indzabambhalo lapho uveta khona kuphumelela nobe kwehluleka kwembali kuveta umbono wakhe kulenoveli.

Indzabambhalo yakho ayibe nemagama langabi ngaphasi kwala-340 kodwva angabi ngetulu kwala-390.

**[25]**

**NOBE**

## **UMBUTO 9: IMIBUTO LEMIFISHA**

### **KUBAMBA LETINGELAKO – DE Nkosi**

Fundza letheksthi lelandzelako bese uphendvula imibuto letawulandzela.

'Bantfu labanyenti bayatitsandza futsi bayakholelwa etinkhanyetini ngako-ke kumele tibocanjwa emagama eSiswati. Leso siphakamiso lekumele sentiwe ebhodini yelulwimi. Uma utifundzisisa tonkhe letinkhanyeti kugcama loku lokulandzelako: Kukhutsata nekujivata tento letitsite, kufundzisa, kubonisana, kwelulekana, kumisa sibindzi, kuniketana emandla nekucondzisana,' kusho Mphikeleli.

'Mine ngitibona tifana nemidlalo nje kuphela,' kusho Msiti.'

'Nayo imidlalo ibalulekile ngobe itsi idlalwa ibe ifundzisa, yakha, ikhutsata, yeluleka futsi ifundzise,' kusho Mphikeleli. Wachubeka Mphikeleli watsi, 'Ngabe nisayati nje imidlalo nine? Uma ngingatsi nginikeni mibili, bese niyachaza kutsi kwentakalani ningaphumelela?'

Lotifiso watsi, 'Mine nginika imidlalo lemibili, mefikafika nalotsi sicoco. Mefikafika-ngumdlalo wekugijima. Nitsi nasenitewufika endzaweni lebeniya kuyo bese nitsi ake nichudzelane ngekugijima nome nidale mefikafika kucala. Latawufika muva ngumfati wesicoco. Ngulowo nalowo utawugijima kuze angahlekwa ngekutsi ungumfati wesicoco. Bafana nemantfombatana bangawudlala kanyekanye. Sicoco- ngumdlalo wekugcuma rjeneticoco nishiyane. Bafana bangawudlala bodywa nemantfombatana odvwa. Bebulili bonkhe, bangawudlala kanyekanye.'

'Ngabe kugcamani-ke kulemidlalo lemibili lewusinike yona?' Kubuta Mphikeleli.

'Kwekucala kugcama kukhutsata mayelana nekugijima nekuchudzelana. Kwesibili kushukumisa imitimba, bunye, nekukhutsatana ekwenteni info kanyekanye,' kusho Lotifiso.

'Sinike imidlalo lemibili loyikhumbulako, Msiti,' kusho Mphikeleli.

'Mine ngikhumbula ingcatfu nengendvo.

Ingcatfu-ngumdlalo lodlalwa ngentsambo ibanjwa ngalapha nangalapha ishaywe iijke kakhulu ngesivinini lesikhulu emoyeni kodvwa kulandzelwe umjikeleto lohlelekile bese kuba khona loyingenelako agcume ngephasi kwayo ingamshayi. Ingamshaya kufanele aphume kungene lomunye. Emantfombatana neba fana bangawudlala lomdlalo.

Kuletinye tigodzi kutsiwa ngumdlalo wemantfombatana kuphela.

Ingendvo- ngumdlalo wematje. Lamatje avamise kuba lishumi namabili. Afakwa emgodzini lomncane logujwe kahle. Ngulowo nalowo lodlalako uba nelitfuba aphose lakhe litje etulu bese uhwapuluta lawo lasemgodzini awakhipe abuye aphose lakhe etulu. Ngalesikhatsi lisemoyeni awabuyisele lawa lawahwapulitile ashiye ngephandle lawo lawafunako. Kungaba linye nome mabili nome matsatfu nome mane njalonjalo. Unika lomunye nasahlulekile kushiya ngaphandle lawo lekfanele awashiye, ehluleke kukhipha lamanyenti ngalokwenele nobe naliwile lelitje lakhe laliphosa etulu. Ngalokuvamile lomdlalo udlalwa ngemantfombatana, kodvwa neba fana bangawudlala.'

'Yini lephawulekako kulemidlalo lemibili lewuyibalile?' Kubuta Mphikeleli.

'Umdlalo wekucala uveta kunyakatiswa kwemitimba njengelikhono lelenta imitimba ihlale iphilile. Umdlalo wesibili utsintsa kunyakatiswa kwetandla nekusebenta kwemicondvo ngendlela lesheshako,' kusho Msiti.

[Likhasi 62-63]

- 9.1 Linyenti likholelwa ekutseni tinkhanyeti tenta umsebenti lobalulekile emphilweni yemmango. Sekela lesitatimende ngekucaphuna imisebenti **LEMBILI** lebalwe kuletheksthi lengenhla. (2)
- 9.2 Lucwaningo lutsi bantfu labanyenti baseNingizimu Afrika sebahlaselwe sifo sekukhuluphala ngalokwecile. Umbhali walenoveli uvete indlela yekutivocavoca ngemidlalo lengasita bantfu kutsi benciphise imitimba yabo. Nika letinye tindlela **LETIMBILI** lotatiko letingasita bantfu kutsi benciphise imitimba yabo. (2)
- 9.3 Uyavumelana yini nekutsi letheksthi lengenhla yesekela kutfutfukiswa kwelulwimi. Sekela imphendvulo yakho ngekucaphuna etheksthini. (2)
- 9.4 Letheksthi lengenhla itsi imidlalo ingancedza kutsi bantfu benciphise imitimba. Ngutiphi tintfo letinye **LETIMBILI** lusha lolungazuza kuto ngetemidlalo ngaphandle kwekunciphisa imitimba? (2)
- 9.5 Letheksthi lengenhla ibaluleke kangakanani ekutfutfukiseni indzaba lekulenoveli? Chaza. (2)
- 9.6 Nawufundza lenoveli ngusiphi sigameko lesiluvutfondzaba/sicongo? Usho ngani? (2)
- 9.7 Phawula ngengwijikhwebu letfolalaka esiphetfweni salenoveli. (2)

- 9.8 Catsanisa inchubo lesentjentiswa kuphatfwa kwesikolo iKhayaletfu ekutsatseni tincumo kulenovel, nendlela lekuphatfwa ngayo tikolo talomuhla. (2)
- 9.9 Lotifiso ulilandzele kangakanani libito lakhe nawubuka tigameko letenteka kulenovel ngaMphikeleli? Chaza. (2)
- 9.10 'Kuletinye tigodzi kutsiwa ngumdlalo wemantfombatana kuphela.' Phawula ngalesitatimende ubhekise emtsetfwenisisekelo waseNingizimu Afrika. (2)
- 9.11 Phawula ngekuhambisana kwenkhanyeti yaMphikeleli, i-Aries, nalokwenteka esiphetfweni salenovel. (2)
- 9.12 Nawufundzisia lenovel nguuphi umlayeto lowetfulwa ngumbhali ngalenovel lets Kubamba Letinglako. Usho ngani? (3)  
**[25]**

**SAMBA SESIGABA B:** **25**

## SIGABA C: UMDLALO

Kulesigaba kunemidlalo lemibili. Wena-ke khetsa ube MUNYE lowufundze eklasini lonyaka uphendvule ngawo.

**CAPHELA:** Khetsa emkhatsini WENDZABAMBHALO NEMIBUTO LEMIFISHA kulowo mdlalo lowufundzile. Nangabe ukhetse kuperhendvula umbuto wendzabambhalo enovelini, uphocelelekile kutsi kulesigaba uphendvule imibuto lemifisha. Nangabe ukhetse kuperhendvula imibuto lemifisha enovelini, uphocelelekile kutsi kulesigaba uphendvule umbuto wendzabambhalo.

## UMBUTO 10: UMBUTO LOYINDZABAMBHALO

### KWAHLWA EMINI – JJ Thwala

Bhala indzabambhalo ngemasu lamatsatfu lasetjentiswe ngumbhali kuveta badlali balomdlalo bese unika sibonelo semdlali kulelo nalelo lisu lolikhetsile.

Indzabambhalo yakho ayibe ngemagama langabi ngaphasi kwala-340 kodwva angabi ngetulu kwala-390.

[25]

### NOBE

## UMBUTO 11: IMIBUTO LEMIFISHA

### KWAHLWA EMINI – JJ Thwala

Fundza letheksthli lelandzelako bese uphendvula imibuto letawulandzela.

(Makhosi na Lungile bakhibikile, bahleti ngaphasi kwesihlahla semtfolo).

Lungile: Ingabe luhlelo lwalamuha luyawuhamba njani Sigegedze?

Makhosi: Kumele ngiyekwelashwa lamuhla, kutawube kusetjentiswa imitsi lecondzene nemakhosi. Kuyawubikelwa emadloti ngemsebenti wonkhe wakusasa. Kuyawuhlatjwa tinjilane netinkhuleko. Inyama kuyawube kutidvuli tebasali. Lelo nalelo livanya ligcwele tjwala nemahewu. Liyawutsi liphendvuka lijiko bantfu batawube sebanganetihlabatsi telwandle. Labadvuna batawuhlehla, labasikati bagidze umchuchumbela.

Lungile: Ngitawube ngikhona nami Sigegedze, nome ngihihushwa luvalo lengingati kutsi Iwani nje. Ngitawufuna kubona konkhe lokutawube kwenteka kusasa. Lapho emehlo ami angeke afinyelele khona, kutawufinyelela aBonakele. Ngalokunjalo nakuwe, njengemnikati wemsebenti angeke ukubone lokunyenti. Ngako-ke umuntfu lekumele abukane netintfo letinyenti nguSifiso.

Makhosi: Kusukela lamuhla kuze kwendlule umsebenti ngitawube ngidla kudla lokuphekwe ngumake edladleni kitsi. Tinhltiyo talabanye tibovu njengobe kulindzelwe kutsi ngitsatse sikhundla. Baphemba umlilo lebangeke bawotse.

Lungile: Ngiyajabula nawukubona loko Sigegedze. Kukhona labatimisele kupheka imbuti netimpaphondvo kulomsebenti. Kumele sishaye ngendvuku phasi babone kutsi asivumelani nabo, futsi siyabubona butulujane babo. Ase uchaze kutsi ngubani lotawube akwelapha?

Makhosi: Ngitakwelashwa yinyanga yesive.

Lungile: Nje kukhona yini kumetsema babe Ndlonglo?

Makhosi: Utakwelapha sitfunti sami, hhayi mine! Angeke ngivume nangeliputsa kutsi angitsintse. Nangitawuvuma loko kutakusho kutsi ngiyimphumphutse. Umuntfu lasamnkantjubovu Ndlonglo kodvwa angeke ngimetsembe. Ngiyinkhomo ledla yodvwa nje kungenca yabo boNdlonglo laba.

Lungile: Ngeke kutsiwe uphikisana nemavi enkhosi nawungavumi kwentiwa loko latawufuna kukwenta.

Makhosi: Kutawushiwo njalo kodvwa ayikho intfo lengingayenta. Kuvuma kwami kutawube kuhombisa inhloniphoo kubabe nekukhotsama kwami. Kwala kwami kutawube kuhombisa kuphephisa imphilo yami elulakeni iwekuwa.

Lungile: Akusuwe Makhosi lebewubabona bangemabutela boNdlonglo?

Makhosi: Ngihleli phasi ngabukisia. Kulabantfu, ungaya emakhateni.

Lungile: Kuhle kuyibona ingoti isekhashane kunekutsi ikutume ungakatelei.

Makhosi: Uyalibona leliwa kutsi liyingoti njani? Nawungashayisa ngenhloko kulawa ematje ngeke uphile.

Lungile: Mahle lamatje sengatsi abebatwa ngumunfu awahlalele. Nawungendlula kuwo ugijima utfolwe ngulinye enhloko ungalala umlalela wafutsi. Yinhle imvelo Makhosi. UMdali wayidala ngenhloso yekutsi ihlobise live lakhe. (*Wavalelisa Lungile wahamba*).

[Likhasi 127–130]

- 11.1 Kuletheksthi lengenhla caphuna emagama aMakhosi lakhomba kutsi akasuye tsatsekile. (2)
- 11.2 Lomdlalo uveta timo letinyenti letingakholweki nayicatsaniswa nemihambo nemisimeto leyentiwa nakubekwa emakhosi njengobe naMakhosi atawubekwa ngelilanga lelilandzelako. Veta timo LETIMBILI letingakholweki letenteka kuletheksthi. (2)
- 11.3 Nawufundzisa lomdlalo ubona kutsi ngusiphi sizatfu lesikhulu lesente libandla leMfelandzawonye lisebentise Ndleleni kufeza tinjongo talo? (2)
- 11.4 Catsanisa indlela Ndzabeni labitwa ngayo kuletheksthi (Ndlonglo) netento takhe kulomdlalo. (2)

- 11.5 Phawula ngeligalelo lalamavi aLungile lekuchaza buhle bemvelo lebekeme kuyo naMakhosi. (2)
- 11.6 Nawufundza lomdlalo ucabanga kutsi nguyiphi indlela lesnjentiswako kulommango waseLusizini kusombulula tinkinga temmango? Sekela ngekuveta sigameko SINYE. (2)
- 11.7 Lomdlalo uyawavula emehlo etetsamelilwati. Uyavumelana noma uyaphikisana naloko? Sekela imphendvulo yakho. (2)
- 11.8 Nangabe lendzaba beyenteka esikhatsini salomuhla, nguliphi ligalelo lebelingadlwa yithekhnoloji esiphetfweni salomdlalo. (2)
- 11.9 Ucabanga kutsi yini lebeyenta Lungile ashaywe luvalo nakacabanga lusuku lolulandzelako lwekubekwa kwaMakhosi? (2)
- 11.10 'Baphemba umlilo lebangeke bawotse.' Humusha lesisho usibhekise kulokwenteka kulomdlalo. (2)
- 11.11 Lulwimi lwembhali luvakala lunotsile. Sekela ngemaphuzu LAMABILI ubhekise kulenkulumo yaMakhosi lelandzelako:  
'Liyawutsi liphendvuka lijiko bantfu batawube sebanganetihlabatsi telwandle.' (2)
- 11.12 Ngekwakho kubona ngubani longabekwa licala ngekuva kwaNkhanise?  
Chaza. (3)
- [25]

**NOBE****UMBUTO 12: UMBUTO LOYINDZABAMBHALO*****UMVUZO – NS Nzima***

Bhala indzabambhalo ngemasu lamatsatfu lasnjentiswe ngumbhali kuveta badlali balomdlalo bese unika sibonelo semdlali kulelo nalelo lisu lolikhetsile.

Indzabambhalo ayibe nemagama langabi ngaphasi kwala-340 kodvwa angabi ngetulu kwala-390.

[25]

**NOBE**

**UMBUTO 13: IMIBUTO LEMIFISHA****UMVUZO – NS Nzima**

Fundza letheksthi lelandzelako bese uphendvula imibuto letawulandzela.

Sakhile:	Ngabe dokotela utalwa ekhaya lelinjani?
Mkhubu:	Babe abehamba ngelibhayisikili alungisa tivandze edolobheni eBhadini. Abesebenta ngeMsombuluko, Lwesitsatfu nangaLwesihlanu. Abekwati kufundza libhayibheli nje kuphela. Make abehlala ekhaya enta imisebenti yelikhaya. Bobabili abamange babe nenhlanhla yekwati umnyango weliklasi lesikolo. Ngaso sonkhe sikhatsi bebahllala bakhulumna ngesikolo.
Sakhile:	Kuyevakala dokotela kutsi utalwa ekhaya leletayelekile njengemakhaya onkhe. Wadlondlobala kanjani kutsi ufundze ugcine ufinyelele lapho ukhona nyalo?
Makhubu:	Bengihle ngihamba ngiyewubamba ematoho nangabe tikolo tivaliwe emayini eMntsoli. Ngiphile ngematoho ngagcina ngiphumelele ebangeni lelishumi nakubili esikolweni Ekulindeni. Ngatfola umfundzate ngenca yemiphumela lemhle ngayewukwenta ticu teSayensi enyuvesi yaKazulu. Lapho-ke besekukhanya tibani kimi. Ngakwati kushashabula etifundvwjeni tami.
Sakhile:	Ngutiphi teluleko lotinika bafundzi baseMkhuphukantsaba?
Makhubu:	Sicubulo lengininika sona sitsi, <i>Imfundvo kucala</i> kuyo yonkhe info lewuyentako. Umfundzi lotawuphumelela emfundvweni ngulowo lotawushakutela nobe ashashabule kutemfundvo. Ngicela liklasi lisho lamavi ngemuva kwami: <i>Imfundvo kucala!</i> <i>Imfundvo kucala!</i>
Liklasi:	Imfundvo kucala! Imfundvo kucala!
Makhubu:	Shikitela kutemfundvo! Shikitela kutemfundvo!
Likhasi:	Shikitela kutemfundvo! Shikitela kutemfundvo!
Makhubu:	Ngiyetsema-ke bafundzi kutsi abekho emkhatsini wenu labatawunwabuluka, labatawukokola, labatawubundlelala. Likusasa lakho liyawulungiswa nguwe. Nguwe lophetse sikhiya salo. Caphela ingoti yekukhohliswa nekwelulekwa bantfu labangenalwati. Kuhle kuyibalekela ingoti kunekungena bese wetama kuphuma kuyo. Indlela yekubalekela ingoti kulalela nawutjelwa, kubukisisa ngembikwekwenta info nekubutisia nawungeva. Kubalulekile kutsatsa teluleko talabadzala nemahlahlandela ekwenteni tintfo.

Sakhile: Tibalulekile teluleko lesitifola lamuhla. Sengatsi tingahlala tikhumbuleka emicondvweni yetfu ngaso sonkhe sikhatsi. Umbuto wekugcina dokotela ngulona lolandzelako: Utsini ngembulalave?

[Likhasi 87–89]

- 13.1 Mangaki emalanga evikini, uyise waDokotela Makhubu labengasebenti ngawo? Usho ngani? (2)
- 13.2 Bekuyini imbangela yekubamba ematoho kwaMakhubu ekubenि anebatali bakhe bobabili? Humusha. (2)
- 13.3 Kuletitatimende letimbili shano kutsi ngusiphi lesingemaciniso, ngusiphi lesingumbono:
- 13.3.1 Likusasa lakho liyawulungiswa nguwe.
  - 13.3.2 Nguwe lophetse sikhiya selikusasa lakho.
- 13.4 Ngutiphi tingoti tekukhohliswa letishiwo nguMakhubu kulemimango lesiphila kuyo njengebantu labasha? Bhala tibe TIMBILI. (2)
- 13.5 Bhala tintfo LETIMBILI letenteka emmangweni lesiphila kuwo letitinkhomba tekutsi sicubulo saMakhubu asikacikelewa elusheni Iwalomuhla. (2)
- 13.6 Kuleliklasi lelicocisana naMakhubu bobani loneliciniso labo kutsi loku lebekukhulunywa nguMakhubu kwangena kulenyе indlebe, kwaphuma kulenyе? (2)
- 13.7 Tetsamelilwati talomdlalo tifundzani ngemphilo yaDokotela Makhubu? Bhala kube KUBILI. (2)
- 13.8 Kube wena unguDokotela Makhubu bewutawuphendvula utsini lombuto waSatile wekugcina? Bhala timphendvulo tibe TIMBILI. (2)
- 13.9 Ucabanga kutsi lemibuto lebeyibutwa nguSakhile abeyitsatsaphi? Sekela imphendvulo yakho. (2)
- 13.10 Nguliphi lisu lelisetjentiswe ngumbhali ekuveteni Dokotela Makhubu? Shano kutsi lelo lisu limvete angumlingisi lonjani emmangweni. (2)
- 13.11 Lendlela yekufundza lapha kulesikolo saseMkhuphukantsaba itabasita ngani bafundzi etimphilweni tabo nasebacedze sikolo kuleNingizimu Afrika lensha? Bhala kube KUBILI. (2)
- 13.12 Utsini umbono wakho ngekutsi bantfu labakhuluma naMakhubu kube boBatjele naSatile kuphela? Bhekisa imphendvulo yakho etimisweni temtsetfosisekelo waseNingizimu Afrika ngemalungelo ekukhuluma ngekukhululeka. (3)

**SAMBA SESIGABA C:** 25  
**SAMBA SAKO KONKHE:** 80